

28. sept. 2017

**Siunnersuut uunga: Imigassaq pillugu Inatsisartut Inatsisaat nr. xx, xx. xx 2018imeersoq**

(Laura Táunâjik, Siumut)

Imigassamut inatsisissatut siunnersuut imaattoq soqutiginarlorlu Siumumiit ima oqaaseqarfigissavarput.

Imigassaq assigiinngitsumik kiinaqarlunilusoq saqqummertarpoq. Imigassarlu pillugu oqallisileraangatta isumarpassuit assigiinngitsut saqqummalersarput. Tassuunnakkut ersarippoq qanoq qulequtaq taannarpiaq pillugu oqallisiginissarput pingaruteqartigisoq. Piffissanngorsimavormi ullutsinni inuiaqatigiinni imigassamik atueriaatsitta immikkut oqallisigineqarnissaa. Taamaattumik Naalakersuisut saqqummiussaannut qujalluta suliniummut angisuumut Siumumiit peqataajumalluta nalunaarutigissavarput.

Imigassamut inatsisissatut siunnersuut atuarnerni arlalinnik soqutinartunik maluginiagaqarpugut. Assersuutigalugu:

§25 Imm.2 Arfininngornermi nal. 11:00-imit 15:00-imut ammasarfissap allanngortinneqarnissaa siunnersuutigineqarpoq. Taamak siunnersuuteqarneq sunarpiaq tunngavigaa? Qanorlu kinguneqarnissaa naatsorsuutigineqarpa?

§28 Imigassat aalakoornartortallit pisiniarfimmi nioqqutissanut allanut akuutinnagit assiaqusersorneqassapput. Tamannarpiaq pillugu Naalakersuisut sukumiinerusumik maleruagassaliorumallutik pilersaaruteqarput. Qaqugu tamatuma naammassineqarnissaa naatsorsuutigineqarpa? Aamma qanoq aaqqissuusisoqarnissaa ilimasuuteqarfigineqassava?

Kapitali 6-mi § 31. Imigassatortitsisarfinni nal. 23.00-ip kingornatigut imigassartortitsisuni inunnik matulerisutut nakkutilliusussanik sulisoqassasoq siunnersuutigineqarpoq. Uanili imerniartarfiit pineqarnerat takuneqarsinnaangilaq. Tamannalu ersarinnerusariaqartoq Siumumiit isumaqarpugut.

§34 Sumiiffinni imigassanik aalakoornartortalinnik tuniniaffiusuni imaluunniit imigassartorfiusuni kikkunnit tamanit orninneqarsinnaasuni inerteqqutaavoq tamat ornittagaanni eqqissiviilliornermik



imaluunniit allanut tamatumaniittunut imaluunniit eqqaani najugaqartunut akornusersuutaasumik kinguneqarsinnaasutut nalilernerqarsinnaasumik nipiliorluni, nakuuserluni, narrunarsaalluni imaluunniit taamaaqataanik ileqqulersortoq siunnersuutigalugu. Imak paasisariaqarnerpa pisiniarfiup eqqaaniittartut uani aamma pineqartut? Taamaassimassappat piffinni aalajangersimasuni ajornartorsiut tamanna unammillerneqartumiippoq. Nakkutillineq sulisoqarnikkullu atorfinitsitat amigarmata. Tamanna Naalakkersuisunit immikkut nalilersorneqarnissaa Siumumiit inassutigaarput.

§38 Imigassaq ikiaroorntullu pillugit apeqqutinut nalinginnaasunut atatillugu Imigassaq Ikiaroorntorlu pillugit Siunnersuisooqatigiinnik Naalakkersuisut pilersitsinissaminnik pilersaaruteqarsimapput. Qaaguuna Siunnersuisooqatigiit pilersinneqarnissaat qanorlu inissinneqarnissaat naatsorsuutigineqartut?

§41 pillugu tamat oqartussaaqataanertut nipilimmik oqariartuuteqarneq assut Siumumiit iluarisimaaratsigu oqaatigerusupparput.

Ilanngullugu soqutigalugu paaserusupparput tusarniaanermi niuertarfiutillit neriniartarfiutillillu qanoq uuma inatsisissatut siunnersuutigineqarnerup taakkununga kinguneqarsinnaanera itisileqqullugu.

Imigassaq pillugu qulaajagassat sunniutaasinnaasullu pillugit misissuilluartoqaqqissaartariaqarpoq. Paasissutissallu sukumiisut ilaatigullu pinaveersartitsinermut tunngasut qanoq aaqqissuunneqarnissaat ilanngullugit ersarissaasoqarnissaa Siumumiit kaammattuutigaarput. Minnerunngitsumik inuiaqatigiit qanoq inissisimanerat suliassaqarfiit akimorlugit aaqqissuisoqartariaqarpoq. Kommune, pisortaqarfiit ilinniartoqarfiit assigisaallu uani eqqarsaatigivagut. Uani susassaqtut sapinngisamik amerlanerpaat peqataatinneqarnissaat kissaatigaarput. Qaammarsaaneq torernersumillu imigassamik atuisinnaaneq anguniarnera annertusarneqartariaqarput. Misilittakkallu nunatta avataaniittut maannamut ingerlareersimasut ilanngullugit paasisassarsiorfigiinnarnagit isumassarsiorfigineqarnissaat ilanngunneqartariaqarpoq. Sunniutit suut qanoq innutaassunut kingunersimanersut qanorlu ineriartorinneqaaqqissinnaanersut qulaajaaffigineqartariaqartut Siumumiit kaammattuutigaarput. Minikkusunngilarpullu sumiiffinni nunatta iluani imigassamullu atueriaatsit ilanngullugit immikkut nalilersuiffigineqartariaqartut isumaqarpugut.



Naggataagut oqarusuppugut pissutsit ullumikkutut ittut imigassaq aallaaviulluni Naalakkersuisup saqqummiusnaanut tunngasut paatsuunngilluinnarlugit ilaleratsigit. Naak imigassaq pillugu oqallitarnitsinni isummat assigiinngitsut puttallartinneqartaraluit taamaattoq pissutsit sineriatanni meeqqanut inuusuttunullu aammami innutaaqataasunut pisartut kingunipiluutaasullu akuersaannginnatsigit Siumumiit erseqqissarusupparput. Taamaattumik isumatusaarnertut isigaarput una ataatsimiititaliamut susassaqartumut ingerlateqqinnissaa, tassanilu inaarsarlugu iluarsisassat aaqqiiviginissat taamaasilluni tulluurtumik aaqqissuussinissaq pitsaanerusumillu angusaqarfigineqarnissaa siunnerfigeqqullugu.

Laura Táunâjik

Siumut